


ხაშურის მთაშვე



№12 (93)

27 მარტი, ორშაბათი, 2017 წელი



ყოფილი აგურის ქარხნის ტერიტორიაზე პარკი გაშენდება

ხაშურის მუნიციპალიტეტის გამგებელი გიორგი გურასპაშვილი საქართველოში ლიტვის რესპუბლიკის სრულუფლებიან და საგანგებო ელჩი გიედრიუს პუოჯუნასს შეხვდა. შეხვედრას ესწრებოდა მუნიციპალიტეტის გამგეობის ეკონომიკური განვითარების სამსახურის უფროსი სერგო ლალიაშვილი და საელჩოსა და მუნიციპალიტეტის სხვა წარმომადგენლები.

შეხვედრაზე განიხილეს ხაშურში,ყოფილი აგურის ქარხნის ტერიტორიაზე რეკრეაციული ზონის - პარკის გაშენების საკითხი. სტუმრებმა და მასპინძლებმა ერთად დაათვალიერეს პარკისთვის განსაზღვრული ტერიტორია, რომელიც მუნიციპალიტეტის საკუთრებაშია.

აგურის ქარხნის ტერიტორიაზე პარკი ლიტვური მხარის ფინანსური მხარდაჭერით და ხაშურის მუნიციპალიტეტის ჩართულობით გაშენდება. ამ ეტაპზე მიმდინარეობს პროექტის ტექნიკური ნაწილის მოწესრიგება, რის შემდეგაც გაიწერება პროექტის დეტალური გეგმა და დაიწყება სამუშაოები.

პარკის გაშენების პროექტი მასშტაბურია. იგი არსებული ტერიტორიის დასუფთავებას, ლანდშაფტის მოსწორებას და სრულ რეაბილიტაციას მოიცავს. შესაბამისად, პროექტის განხორციელება რამდენიმე ეტაპად მოხდება.

პროექტის დასრულების შემდგომ ხაშურელი მოსახლეობის კულტურული დასვენებისთვის ახალი კომფორტული სივრცე შეიქმნება.



მუნიციპალური განვითარების ფონდი და მსოფლიო ბანკი ხაშურის მე-7 საბავშვო ბაღის რეაბილიტაციაში მონაწილეობენ

ხაშურის მე-7 საბავშვო ბაღს საქართველოს მუნიციპალური განვითარების ფონდისა და მსოფლიო ბანკის წარმომადგენლები სტუმრობდნენ. მუნიციპალური განვითარების ფონდის დონორებთან ურთიერთობის და პროექტების მართვის სამსახურის უფროსი თენგიზ გოგოტიშვილი და მსოფლიო ბანკის წარმომადგენლები შოლან ვინგის ხელმძღვანელობით, ხაშურის მუნიციპალიტეტის გამგებელს გიორგი გურასპაშვილს, ეკონომიკური განვითარების სამსახურის უფროსს სერგო ლალიაშვილს და ინფრასტრუქტურის განვითარების და კეთილმოწყობის განყოფილების უფროსს გიორგი პაპიაშვილს შეხვედნენ და მე-7 საბავშვო ბაღის რეაბილიტაციის გეგმები განიხილეს.

ხაშურის მუნიციპალიტეტის თანამშრომლობა მუნიციპალური განვითარების ფონდთან გასულ წელს დაიწყო. შედეგად, დაიგეგმა მნიშვნელოვანი პროექტი - VII საბავშვო ბაღის სრული რეაბილიტაცია. პროექტი საბავშვო ბაღის ეზოს კეთილმოწყობასაც ითვალისწინებს. პროექტის ღირებულება 911 000 ლარია. უკვე ამოცხადებულია ტენდერი და სამუშაოები მაისის ბოლოს დაიწყება.

მუნიციპალური განვითარების ფონდისა და მსოფლიო ბანკის წარმომადგენლებმა ხაშურის „ივერიის“ სტადიონიც დაათვალიერეს. ამ ეტაპზე დაწყებულია მოლაპარაკება სტადიონის რეაბილიტაციასთან დაკავშირებით.

უახლოეს დღეებში, სტადიონის რეაბილიტაციის პროექტის მომზადების პროცესი დაიწყება.

აღსანიშნავია, რომ გასულ წელს, „ივერიის“ სტადიონის სარეაბილიტაციო სამუშაოებთან დაკავშირებით, მუნიციპალიტეტმა ფეხბურთის ფედერაციასთან გამართა კონსულტაციები და ტექნიკური დახმავება ფეხბურთის ფედერაციის რეკომენდაციების გათვალისწინებით განხორციელდა.

სტადიონის რეაბილიტაციის პროექტი საკმაოდ მასშტაბურია, ამიტომ დონორი ორგანიზაციების ჩართვა ძალიან მნიშვნელოვანია.

შეხვედრა მეფუტკრეებთან

მეფუტკრეობის სასოფლო-სამეურნეო კოოპერატივების მხარდაჭერის სახელმწიფო პროგრამის ფარგლებში, ხაშურში, კოოპერატივების განვითარების სააგენტოს წარმომადგენლები იმყოფებოდნენ, რომლებმაც ხაშურელ მეფუტკრეებს და ამ სფეროში დაინტერესებულ პირებს, პროგრამაში მონაწილეობის წესები და უახლესი შეთავაზებები გააცნეს. სახელმწიფო პროგრამაში მონაწილეობს, თანადაფინანსებით, ღირებულებების 30%-ად გადაცემით საკუთრებაში არსებული სკების იდენტური რაოდენობა, ამასთან, 1 ცალი 12 ჩარჩოიანი თაფლის საწური (ციბრუტი), თაფლის შესანახი 40, 60 და 220 ლიტრიანი ავზები, რომელთა ჯამური ტევადობა არ უნდა აღემატებოდეს 2 200 ლიტრს. მონაწილეს შეუძლია მოითხოვოს არაუმეტეს 11 ცალი 40 ლიტრიანი და 11 ცალი 60 ლიტრიანი ავზი, 1 ცალი ფიჭის ასათლელი დანა ელექტროგამაცხელებლით, ფიჭის ანათაფის ავზი და 1 ცალი დენის ძაბვის გადამყვანი 220V-დან 12V-ზე. იმ კოოპერატივს, სადაც მეპაიეების 50%-ს შეადგენენ დევნილები ან/ და შეზღუდული შესაძლებლობის მქონე პირები, ასევე იმ კოოპერატივებს, რომელთა მეპაიეებს შეადგენენ ქალები, კაპიტალური ინვესტირება გადაეცემათ ღირებულების 20%-ის ოდენობით.

უფრო ვრცელი და სრულყოფილი ინფორმაციის მიღება, დაინტერესებულ პირებს, სოფლის მეურნეობის სამინისტროს ხაშურის საინფორმაციო-საკონსულტაციო სამსახურებში შეუძლიათ და ასევე, კოოპერატივების განვითარების სააგენტოს ოფიციალურ ვებ გვერდზე - www.acda.gov.ge



მეგობრები არ ითვლიან ქრომოსომებს

ხაშურის გამგეობის და მუნიციპალიტეტის სპორტის განყოფილების ერთობლივი ძალისხმევით, 21 მარტს, დაუნის სინდრომის საერთაშორისო დღესთან დაკავშირებით, საბავშვო ბიბლიოთეკაში

გაიმართა ღონისძიება „მეგობრები არ ითვლიან ქრომოსომებს“.

ხალისიანი ღონისძიების შემდეგ, პატარები ხაშურის მუნიციპალიტეტის გამგებელმა გიორგი გურასპაშვილმა, გამგებლის მოადგილემ ზურა ჩხიტიანი და კულტურის სამსახურის წარმომადგენლებმა ტკბილეულით გაახარეს.

ღონისძიების ბოლოს, ბავშვებმა ფერად ფურცლებზე სურვილები დაწერეს და საგანგებოდ შექმნილ „ნატურის ხეს“ ჩაუთქვეს.

„ბამოიწერეთ და იპითხეთ „ხაშურის მთაშვე“

ხაშურის მუნიციპალიტეტის გამგებლის ბრძანება #116-პ/შ

13 მარტი, 2017 წელი

არასამეწარმეო (არაკომერციული) იურიდიული პირის - "ხაშურის მუნიციპალიტეტის სკოლისგარეშე სახელოვნებო საგანმანათლებლო დაწესებულებების - სამუსიკო სკოლების გაერთიანების" მმართველის თანამდებობაზე ლილი რუხაძის დანიშვნის შესახებ

საქართველოს ორგანული კანონის "ადგილობრივი თვითმმართველობის კოდექსის" 61-ე მუხლის მესამე პუნქტის „ა“ ქვეპუნქტის, ხაშურის მუნიციპალიტეტის გამგებლის 2017 წლის 13 მარტის №942 ბრძანებით დამტკიცებული წესდების მესამე მუხლის პირველი პუნქტის და ლილი რუხაძის 2017 წლის 13 მარტის, №1355 განცხადების საფუძველზე

ვ ბ რ ძ ა ნ ე ბ:

1. არასამეწარმეო (არაკომერციული) იურიდიული პირის - „ხაშურის მუნიციპალიტეტის სკოლისგარეშე სახელოვნებო საგანმანათლებლო დაწესებულებების - სამუსიკო სკოლების გაერთიანების“ მმართველის თანამდებობაზე 2017 წლის 14 მარტიდან დაინიშნოს ლილი რუხაძე;

2. ბრძანება ეცნობოს: ლილი რუხაძეს;

3. ბრძანება ეცნობოს: ხაშურის მუნიციპალიტეტის გამგებლის ადმინისტრაციულ, ეკონომიკური განვითარების, განათლების, კულტურის და სპორტის და საბიუჯეტო სამსახურებს, საჯარო რეესტრის ეროვნული სააგენტოს ხაშურის სარეგისტრაციო სამსახურს;

4. ბრძანება შეიძლება გასაჩივრდეს დაინტერესებული პირის მიერ მისი გაცნობის დღიდან ერთი თვის განმავლობაში სარჩელის წარდგენის გზით ხაშურის რაიონულ სასამართლოში (ქ. ხაშური, მერაბ კოსტავას ქ. 15).

მუნიციპალიტეტის გამგებელი გიორგი გურასპაშვილი

ხაშურის მუნიციპალიტეტის გამგებლის ბრძანება #117-პ/შ

13 მარტი, 2017 წელი

არასამეწარმეო (არაკომერციული) იურიდიული პირის - "კულტურის და ბავშვთა და მოზარდთა შემოქმედებითი განვითარების ცენტრების გაერთიანების" დირექტორის თანამდებობაზე გიორგი ბოლოკაძის დანიშვნის შესახებ

საქართველოს ორგანული კანონის "ადგილობრივი თვითმმართველობის კოდექსის" 61-ე მუხლის მესამე პუნქტის „ა“ ქვეპუნქტის, ხაშურის მუნიციპალიტეტის გამგებლის 2017 წლის 13 მარტის, №941 ბრძანებით დამტკიცებული წესდების მესამე მუხლის პირველი პუნქტის და გიორგი ბოლოკაძის 2017 წლის 13 მარტის №1356 განცხადების საფუძველზე

ვ ბ რ ძ ა ნ ე ბ:

1. არასამეწარმეო (არაკომერციული) იურიდიული პირის - „კულტურის და ბავშვთა და მოზარდთა შემოქმედებითი განვითარების ცენტრების დირექტორის თანამდებობაზე 2017 წლის 14 მარტიდან დაინიშნოს გიორგი ბოლოკაძე;

2. ბრძანება ეცნობოს: გიორგი ბოლოკაძეს;

3. ბრძანება ეცნობოს: ხაშურის მუნიციპალიტეტის გამგებლის ადმინისტრაციულ, ეკონომიკური განვითარების, განათლების, კულტურის და სპორტის და საბიუჯეტო სამსახურებს, საჯარო რეესტრის ეროვნული სააგენტოს ხაშურის სარეგისტრაციო სამსახურს;

4. ბრძანება შეიძლება გასაჩივრდეს დაინტერესებული პირის მიერ მისი გაცნობის დღიდან ერთი თვის განმავლობაში სარჩელის წარდგენის გზით ხაშურის რაიონულ სასამართლოში (ქ. ხაშური, მერაბ კოსტავას ქ. 15).

მუნიციპალიტეტის გამგებელი გიორგი გურასპაშვილი



ასე ხომ ჩვენს მომავალს ვჭრით

ყოველდღიურად ვხვდებით მოჭრილ ხეებს, განადგურებულ ტყის ზოლებს, ზოგი ნებართვით და უფრო მეტი უნებართვოდ იჭრება. მიუხედავად იმისა, რომ არსებობს საკმაოდ დიდი ფულადი ჯარიმები და მკაცრი რეგულაციები, მაინც უმოწყალოდ ვკარგავთ მწვანე გარემოს, რომელიც ბევრი სიკეთის საწინდარია. ვთანხმდებით იმაზეც, რომ მოსაჭრელი უნდა მოიჭრას, ჩანაცვლდეს ახალი ნერგით, რომელზეც ისევე მონდომებით უნდა ვიზრუნოთ, როგორც მონდომებითაც ვჭრით. ადამიანები ვართ, არც ადამიანური საჭიროებანია უცხო, სოციალური მდგომარეობაც გასაგებია, რომელიც უფრო ძლიერად მოქმედებს ადამიანის ყოფით ბუნებაზე, მაგრამ მხოლოდ წუთიერი გადარჩენისთვის რომ ვამბობთ უარს მომავალზე, სამწუხაროა. ის, რაც არ გვკლავს მომენტალურად, მომავალში არ ველით საფრთხეს მისგან. ეს წუხილი ნახევრადგაჩეხილია ცხრამუხის მიმდებარე ფიჭვის ქარსაცავმა გამოიწვია. რამდენიმე დღის წინ მოჭრილი ხეები ჩვენც გადავიღეთ, როგორც ვითხრეს, ეს პირველი შემთხვევა არ იყო, რეგულარულად ხდება ამ ზოლის გაჩეხვა. ეს ის ადგილია, სადაც ცენტრალური გზიდანაც კარგად ჩანს გაჩეხილი ხეები და ვფიქრობთ, ჭრის პროცესის დანახვაც არ იქნებოდა შეუძლებელი. გადავწყვიტეთ, გაგვერკვია, თუ რომელმა სამსახურმა გასცა ნებართვა და რამდენად კანონიერად. სამწუხაროდ, ეს შეუძლებელი აღმოჩნდა. ნებართვა არც სატყეო სამსახურის და არც მუნიციპალიტეტის გამგებლების წარმომადგენლების საქმიანობის კოორდინაციის სამსახურის მიერ გაცემულა. როგორც აღმოჩნდა, გამოცემულია დადგენილება, რომელიც ჯერ არ შესულა ძალაში და სანამ გარკვეული რეგულაციები ამოქმედდება, იქამდე უამრავი ხის გაჩეხვა შეიძლება მოხდეს-შედეგები კი ყველას კარგად მოგვეხსენება.

-სპეციალისტი გვიჩვენებს - როგორ შევამციროთ ვაზის სოკოვანი დაავადებათა წინააღმდეგ ჩატარებულ წამლობათა რიცხვი

გაზაფხულდა, მცენარეების სავეგეტაციო პერიოდის დაწყებასთან ერთად, გაიღვიძა იმ მავნე ორგანიზმებმა, რომლებიც, სამწუხაროდ, ჯერ კიდევ საგრძნობლად ამცირებს სასოფლო-სამეურნეო კულტურებიდან მიღებული მოსავლის რაოდენობას და ხარისხიანობას.

ხშირად გავიგონებთ ზოგიერთი მევენახისგან თითქოს „კვეხნით“, რომ 8-10-ჯერ ჩატარა წამლობა. შეიძლება ვაზს 4-5-ჯერ ჩავეუტაროთ მავნე ორგანიზმის წინააღმდეგ ღონისძიება და მივიღოთ უფრო მეტი მოსავალი, ვიდრე 8-10-ჯერ ჩატარების შემთხვევაში. ამისთვის საჭიროა, ზუსტად ვიცოდეთ, იმ მავნე ორგანიზმის ბიოეკოლოგია, რომლის წინააღმდეგაც ვატარებთ ბრძოლის ღონისძიებას. ავიღოთ, მაგალითად, ვაზის ჭრაქი და ნაცარი. ჭრაქის შემთხვევაში, წამლობების რიცხვის შემცირებაში დაგვეხმარება „მიულუსის მრუდი“, რომლის გამოყენების არსი მდგომარეობს შემდეგში: სოკოვანი დაავადებების გამომწვევი ორგანიზმების განვითარების ტემპურატურაა 11-12°, ოპტიმალური 18-24°, მაქსიმალური 29-30°, პაერის მინიმალური ტენიანობაა 95%, ხოლო მაქსიმალური 97-100%. ამ პერიოდში ადგილი აქვს წვიმას. ყურადღება უნდა მივაქციოთ ამინდის პროგნოზს, აუცილებელია გაიზომოს ტემპერატურა და ტენიანობა და ამის მიხედვით ჩავატაროთ ბრძოლის ღონისძიება. ამით შევამცირობთ ზიანს გარემო პირობების წინააღმდეგ, ნაყოფში პესტიციდების რაოდენობას და ხარჯებს, რომლებიც აისახება სურსათის თვითღირებულებაზე.

რ. ლამბარაშვილი, სურსათის ეროვნული სააგენტოს ინსპექტორი




ამ დაულაგებელ ცხოვრებაში ძნელი გასარჩევი გახდა, ვინ კაცია, ვინ-მგელი და ვინ-მგელკაცა. გველი რომ ტყავს იცვლის, ისევე გველის ტყავით იმოსება, მაგრამ კაცი ხან მგლის ტყავში გველინება, ხან -კრავის. ასეთები, ბევრ უკეთურობას ჩაღიან და ამიტომაც მგელკაცად მოვიხსენიებ.

ეს მგელკაცებს არ უნდა ეწყინოთ, რადგანაც ცხოველთა დაცვის ორგანიზაციები მგელს ისეთ სათნო მხეცად წარმოგიდგენენ, რომ მისი სახელში მოშენება მოგიწოდება. თურმე, ის ძალიან ჭკვიანი, ოჯახის ერთგული, გამძლე არსებაა და ლამის მთაში მისთვის საკვების მოძიარებაც დაიწყო. იგი, ისეთი სანიტარი ყოფილა, რომ ჯანმრთელ ჩლიქოსანს ახლოსაც არ ეკარება, მისი შეჭმა ხომ აზრადაც არ მოუვაო.

ტელევიზიით ისიც ითქვა, რომ მონადირემ და მოსახლეობამ კეთილშობილი და ავი წარმოშობის მგელი უნდა გაარჩიოს და ისე გადაწვიტოს მისი ლიკვიდაცია, მაგრამ არ იძლეოდნენ იმის რეკომენდაციას, თუ რა საბუთები უნდა წარმოადგინოს მგელმა, რომ მისი კეთილშობილური წარმომავლობა დაამტკიცოს, ასევე გამოჩინოს მხედველობიდან მისი სისხლის ჯგუფის დადგენის რეკომენდაციები, ცნობების წარმოდგენა, რომ ჰყავს გამოსაკვები ლეკვები და არ არის დაავადებული ცოფით ან სხვა გადაძვლები სნეულებით.

როგორც ამჩნევთ, მგლები საკმაოდ დაცულები არიან სახელმწიფოსგან, ამიტომაც მათ თავზე სახარების წაკითხვის აუცილებლობა თითქოს აღარ არსებობს, მაგრამ ისეთ ადამიანებს, რომლებიც გარეგნულად კაცები არიან, შინაგანად კი მგლის ინსტიქტით ცხოვრობენ, ალბათ არ აწყენდათ რაღაც-რაღაცეების შესხენება და ისეთი კითხვების დასმა, რომლის პასუხის გასაცემად ცოტა ჩაფიქრება მაინც დაჭირდებოდათ, იქნებ გაახსენდეთ, რომ ისინი ადამიანური წარმოშობისა არიან. მაგალითად:

მოდით, მგელკაცას თავზე სახარება წავიკითხოთ



ა) ბატონო მგელკაცა, წავიკითხავს ან ვინმესგან გსმენია თუ არა, გამოთქმა: მიწა ხარ, მიწად იქცეო?

ბ) დადიხართ თუ არა ქუჩაში ფეხით და ამჩნევთ თუ არა, რომ ბევრგან პატარა ბავშვები, ამინდის მიუხედავად, მთელი დღე მშიერი და ხელგაშვერილი დგანან ან ცეკვავენ და მღერ

იან კეთილი ადამიანების მოლოდინში, იქნებ ვინმემ ხურდა ფული უწყალობოს, რომ ლუკმა-პური შეიძინონ და შიმშილით არ მოკვდნენ? რამდენჯერ და რა მოცულობის მოწველება გაგიღიათ მათთვის და განგიცდიათ თუ არა სინდისის ქენჯნა, რომ მეტი არ დაეხმარე გაჭირვებულს?

გ) გყავს თუ არა შვილები და წარმოგიდგენია თუ არა ის საშინელება, რა დღეში ჩავარდებოდი შენს შვილებს რომ ლუკმა-პური ასე ენატრებოდეთ?

დ) დასაფლავებაზე სიარულის დროს, აქცევ თუ არა ყურადღებას ვის რა მიაქვს ამ ქვეყნიდან, მიუხედავად ამქვეყნიურად მისი ქონებრივი მდგომარეობისა?

ე) მიცვალებულთა საბოლოო გზაზე გაცილებისას, მიგოქცევია თუ არა ყურადღება, მას რამდენი ცრემლი და რამდენი ფურთხი მისდევს უკან და გიფიქრია თუ არა, ისე იცხოვრო, რომ ამ ქვეყნიდან წმინდა ცრემლმა გაგაცილოს და არა წყველა-კრულვამ და ლანძღვა-გინება?

ვ) გიფიქრია თუ არა, რომ სიკვდილის წინ მაინც გაუხიარო შენი ქონების ნაწილი ხელმოკლე ახლობლებს ან თანამემამულეებს?

ზ) აცნობიერებ თუ არა, რომ ხალხმა იცის არაკეთილსინდისიერი გზით მითვისებულ მიწათმფობს გუშინ შიშით აკანკალებული მალავდი, დღეს კი ლეგალიზაცია გაუკეთე და კრავის ქურქწამოცმული მგლის მადით, ძველებურად აგრძელებ სხვის ძარცვა-გლეჯვას?

თ) გაგიგონია თუ არა ანდაზა: რაც არ გერგება, არ შეგერგებაო... მოვა განკითხვის დღე, წინ კუბო წავა და უკან ცხოვრება დარჩება. გირჩევ, მგელკაცობას ნაღდი კაცობა, მომხვეჭელობას კი ქველმოქმედება ამჯობინო და თითო მილიონიდან, თითო პროცენტი რომ გაიმეტო, მრავალ თანამემამულეს იხსნი გაჭირვებისგან. „რასაცა გასცემ -შენია, რას არა - დაკარგულია“-ო. ეს ხომ რუსთაველმა ბრძანა.

ი) ტყავის გამოცვლით ხომ ადამიანის გულს ვერ გამოცვლი, მოუსმინე მას ხანდახან და გაიხსენე ბიბლიური შეგონებანი: მშიერი დააპურე, მწყურვალს წყალი მიაწოდე, ავადმყოფი და პატიმარი მოინახულე, სხვისი არაფერი ინდომო, კაცი არ მოკლა, არ მოიპარო, არ იმრუშო და ა.შ.

ყველაზე ღარიბი მილიონერთა შორის ის არის, ვისაც ერთი მილიონი აქვს, მაგრამ მილიონის ერთი პროცენტი იმდენია, რომ ერთ ოჯახს ნოყიერად გამოკვებას წლის განმავლობაში, მილიონერის ქონებას კი ბევრი არაფერი დააკლდება. განა დიდი განსხვავებაა, ჯიბეში ასი ლარი გექნება თუ ოთხმოცდაცხრამეტი? ერთი ლარი აგაშენებს თუ გაგადატაკებს?

თუ ჩვენი ათეულობით ლეგალური და ბევრჯერ მეტი არალეგალური მილიონერი თანამემამულე გაჭირვებულ ადამიანებს ქონების ერთ პროცენტს გაუნაწილებს, მერწმუნეთ, საგრძნობლად გაუმჯობესდება ეკონომიკურად გაჭირვებულ მოქალაქეთა ჯანმრთელობა, აქედან გამომდინარე, შრომისა და ბრძოლისუნარიანობა, ეს კი ქვეყანას დიდად წაადგება.

გახსოვდეთ, რომ ქვეყნის გადარჩენის მთელი სიმძიმე ყოველთვის დაბალი ფენის მოქალაქეთა კისერზე გადადიოდა. ამის მაგალითი ხომ აგვისტოს იმ

მაც გვიხვენა, როცა ნაკლებად შეძლებული ოჯახის შვილები მკერდით იცავდნენ სამშობლოს, ძლიერნი ამა ქვეყნისანი კი ძვირფასეულობით ტვირთავდნენ ავტომანქანებს და საზღვარგარეთისკენ ჰქონდათ გეზი ადებული.

ჟ) ვერავინ გამცემს პასუხს კითხვაზე: რამდენი მილიონი ლარი გაიტანეს ჩვენმა ისეთმა მგელკაცა თანამემამულეებმა საზღვარგარეთ, რომლებსაც საკუთარ სამშობლოში ერთი ლარის ღირებულებისა არაფერი შეუქმნიათ.

სახელმწიფოს რომ სწორი პოლიტიკა ჰქონებოდა, სოციალისტურ ათწლეულებში შექმნილ საერთო-სახალხო ქონებიდან ერთს ბლითი („ბუბლიკი“) და მეორეს მისი ხვრელი არ შეხვდებოდა, ერთ თხილს ცხრა ძმა გაიყოფდა, ერთი შიმშილით, მეორე კი ნებივრობით და გადაძვლით არ მოკვდებოდა.

ლ) მგელკაცავ! მოგისმენია, ტელევიზორიდან მაინც, რომ თითო ლარიან დახმარებას ითხოვენ ავადმყოფი ბავშვები და ცრემლმორეულები ელოდებიან კეთილშობილ ადამიანთა მხრიდან მოწველებას? რა გრძნობა გეუფლება მაშინ და თუ შვილი არ გყავს, ვინმეს შვილი ხომ ხარ და წარმოგიდგენია დედაშენის მდგომარეობა, შენი სიცოცხლის გადასარჩენად, ხელგაშვერილი რომ

მღარიყო ქუჩაში საჭირო თანხის მოსაგროვებლად? თუ წარმოგიდგენია, ნუთუ არ იღვიძებს შენში ადამიანური გრძნობა და არ გიჩნდება გაჭირვებულის დახმარების სურვილი?

მ) მგელკაცავ! ნუთუ შენი გული ისე მოდუნდა და გაუხეშდა, რომ რეაგირებას არ აკეთებს იმ მოხუცთა ცრემლდენაზე, რომლებმაც გადაიტანეს ურთულესი ათწლეულები, ომები, შიმშილობა, სიცივე, მაგრამ მშიერი მუცლით და გამომშრალი ძუძუთი შეძლეს შეენარჩუნებინათ უსუსური შთამომავლობის სიცოცხლე, სისხლით და ოფლით შემოინახეს მშობლიური მიწა-წყალი, სარწმუნოება, სინდის-ნამუსი, შრომისმოყვარეობის და კეთილშობილების ტრადიციები, ახლა კი, მომავლის იმედგაცრუების და შიმშილის გამო, ცრემლებს ღვრიან, დაუძლურებულები ძნელად იტანენ გაჭირვებას, ისინი ხომ შენში ხედავენ ბედნიერ მომავალს და როგორ გაუმართლეს ეს იმედი? ანაირ მოხუცებს რამდენი დამე გაუთენებიათ შენს საწოლთან, როცა უსუსური ან ავადმყოფი იყავი, თვითონ, შიმშილით მიღასლასებულს, რამდენი ლუკმა მოუკლიათ და შენთვის მოუწოდებიათ, რათა შენი სიცოცხლე შეენარჩუნებინათ, ახლა კი შიმშილით დაუძლურებული, ცრემლმორეული ჩაცვენილი თვალებით შემოგყურებენ, შენ იმ იმედით, რომ გაიღებ მცირეოდენ მოწველებას, მადლობას კი ლოცვა-კურთხევით გადაგიხდის და ძველებური სიყვარულით გაგაყოლებს თვალს. ნეტავ იმის შეგრძნების უნარი გქონდეს თუ რა აღმატებულია მადლის გაცემა-მიღების წუთები. ეს კეთილშობილი ადამიანის ახლადდაბდებას უტოლდება და მომაკლავისათვის უკვდავების წყლის წვეთის მიწოდების ტოლფასია, წვეთისა, რომელიც იტევს ადამიანის წარსულსაც და მომავალსაც.

ნ) მგელკაცავ! ნუთუ ერთჯერ მაინც არ გიფიქრია, რომ არ არის კარგი სხვისი უსამართლო ძარცვა-ყველეფით აურაცხელი საგანძურის დაგროვება?

განა, რამდენი უნდა ინებივროთ, ჭამოთ, სვათ და მოინელოთ შენ და შენმა შთამომავლებმა, რომ ყველაფერი შეირგოთ? ნუთუ ერთხელ არ გიფიქრია, რომ რაღაცაზე შენმა შთამომავლებმაც უნდა იზრუნონ, თორემ ფუქსავატური, განებივრებული და გაყოყნებული ცხოვრებით შეიძლება უბედურებას გადაეყარონ?

ბედნიერება ნაწყვეარი ფუფუნებით ცხოვრებაში არ გამოიხატება. ნებისმიერ დროს, შეიძლება, ყველაფერი ისე შემოგეცალოს, როგორც ვარდს ცვივა ფერადი და სურნელოვანი ფურცლები, მისგან კი მხოლოდ სანაგვეში გადასაგები ეკალბარდი რჩება.

არავის გაუკეთებია იმის ანალიზი, ავტოავარიებში დაღუპულ მძღოლთაგან რამდენი იყო ხელომოკლე და რამდენი მდიდარი ადამიანი. როგორც უბიძლო კაცს კბილი არ ეტკინება, ისე ღარიბ-ღატაკ კაცს ავარია ნაკლებად მოუვა.


არც იმის ანალიზი გაუკეთებია ვინმეს, თუ რამდენი ხელმოკლე და რამდენი მდიდარი გაუბედურდა გასართობი ახარტული თამაშების გამო, რამდენი მათგანი გახდა ნარკოტიკულ ნივთიერებებზე დამოკიდებული, რამდენი მათგანი დაავადდა ალკოჰოლური სასმელების ჭარბად მიღების გამო, რამდენმა მათგანმა „აიკიდა“ ვენერიული“ დაავადება გასართობ ღონისძიებებზე შემთხვევითი სექსუალური კავშირების გამო. ნახეთ ვინ ქადაგებს ნარკოტიკების მოხმარების დეკრიმინილიზაციას, თავისუფალ და გაუკუღმართებულ სექსს, ერთსქესიანთა ქორწინების ხელშეშეულობას. ნახეთ ვინ დადის რწმენით ეკლესიაში და ვინ მოჩვენებით.

მე არც მგელკაცას და არც ნამდვილ მგელს ვუსურვებ ოჯახურ ტრაგედიას, შვილების გზიდან აცდენას და სიცოცხლის გამწარებას, დაე, ყველა დატკბეს იმ შეუღარებელი ბედნიერებით, რასაც ბუნების მიერ კარგი შვილებით დაჯილდოება ჰქვია.

მე მინდა, რომ ყველა ადამიანი შინაგანად იყოს კაცთმოყვარე, რომელსაც შეუძლია იცხოვროს ღვთიური შეგონებებით. ასეთ შემთხვევაში, ჩვენს ირგვლივ, აღარ იქნებიან შიმშილით დასუსტებული თვალცრემლიანი ბავშვები და მოხუცები, რომელთა ხილვა გულისტკივილს და სინანულს იწვევს ნებისმიერ კეთილშობილ ადამიანში.

არავინ იფიქროს, რომ მე მილიონერები მეზიზღებიან. პირიქით, მინდა, რომ დალოცვილებმა იცხოვრონ, ამიტომ მოუწოდებ მათ, რომ უშურველად გაიღონ მოწველება, სანაცვლოდ მიიღონ ლოცვა-კურთხევა და ღვთის მფარველობა. მე მგელკაცას ძუნწ მდიდრებს ვუწოდებ, რომლებსაც ჰგონიათ, რომ მთელ ცხოვრებას საფლავში გაატანენ. მათი იქვეყნიური პრივილეგია ის იქნება, რომ სიცოცხლეში ცოდვით დამძიმებულს, სიკვდილის შემდეგ, სხვასთან შედარებით, უფრო დიდ და მძიმე ქვას დაადებენ.

ყველას უნდა ახსოვდეს, რომ ადამიანი მუშტშეკუმშული იბადება, ყველაფერი ჩემიად და ხელგაშლილი საფლავდება - არაფერიც არ მიმაქვსო.



კომბინირებული საკვების დამამზადებელი საწარმო ამოქმედდა

„ხაშურის მოამბე“-ს მიერ დაანონსებული კომბინირებული საკვების დამამზადებელი საწარმო აშენდა. მის შესახებ გასულ წერს გვიამბებთ, როდესაც შენობა ჯერ კიდევ ხარაჩოებში იყო მოქცეული და სამშენებლო სამუშაოები მიმდინარეობდა. ამ დღეებში კი, უკვე დასრულებული საწარმო ადგილზე დავათვალიერეთ და გავსაუბრეთ საწარმოს მფლობელებსაც, ამ საოცრად პერსპექტიული და მომგებიანი საქმის წამოწყებაში მხარი დავეჭირეთ. გაკვირვებული და გახარებული დავრჩით, იდეის სრულყოფა საკმაოდ სწრაფად და მოკლე დროში რომ მოხერხდა, თუმცა, მათივე თქმით, გაწეულ საქმიანობას, უდიდესი



ძალისხმევა დასჭირდა. ჩვენ ისღა დაგვრჩენია მათ წარმატება ვუსურვოთ ამ დიდებულ წამოწყებაში, უდავოა, რომ ეს ენთუზიაზმი და საქმიანადმი განსაკუთრებული დამოკიდებულება, ბოლომდე შენარჩუნდება. საწარმო ს (შპს „მარიამი“) შემდგომ მუშაობაზე, მომხმარებლისათვის შეთავაზებულ სერვისებზე და საკვების ეკოლოგიურ მდგომარეობაზე, ვრცლად, ინტერვიუდან შეიტყოთ.

ლექსო ხარაზიშვილი (შპს „მარიამის“ ერთ-ერთი დამფუძნებელი) – სამშენებლო სამუშაოები 2016 წლის გაზაფხულზე დაიწყო



და ამავე წლის ნოემბერში დასრულდა. საწარმო ხაშური-ბორჯომის გზატკეცილზე მდებარეობს (ქვიშეთამდე), გზიდან 200 მეტრში. უამრავი ფიჭვის, მსჯელობის და აზრების შეჯერების შემდეგ, მოხდა ამ იდეის განხორციელება. ვფიქრობდით, რამდენად გაამართლებდა ჩვენს რაიონში ეს წამოწყება, რამდენად მიიღებდა მომხმარებელი ფრინველის, ცხოველის, თევზის კომბინირებული საკვების შეთავაზებას. საბოლოოდ კი, ამგვარი საკვების მაღალეფექტურობიდან გამომდინარე, მივიღეთ გადაწყვეტილება, რომ მსგავსი პროდუქტის ბაზარზე გატანა ურიგო არ იქნებოდა. საწარმოს აშენებისათვის დაფინანსება იაფი აგროკრედიტის საშუალებით მოხერხდა – სულ 90 000 დოლარი მივიღეთ სესხი. რაღა თქმა უნდა, ეს თანხა წაგვადგა საწარმოს სრულყოფის საქმეში, თუმცა, ჩვენი

გაწეული ხარჯებიც საკმაოდ დიდი იყო. რთული და შრომატევადი აღმოჩნდა ელექტროენერჯის, წყლისა და გაზის მოყვანა შენობამდე, დღეს კი სამივე კომპონენტით უზრუნველყოფილი ვართ. მშენებლობა, ფაქტობრივად, ნულიდან დაიწყო – ტრიალ მინდორზე, როგორც იტყვიან, აგურს აგური დავადეთ, და როგორც ხედავთ საწარმო მზადაა სრული დატვირთვით მუშაობისათვის.

- ბატონო ლექსო, რა ეტაპზეა ამჟამად საწარმოს მუშაობის პროცესი, საკვების წარმოება დაწყებულია?

- დიას, კომბინირებული საკვების წარმოება დაწყებულია, თუმცა, საკვებს ჯერ საცდელად ვამზადებთ, ჩვენ პროდუქტს ვაცნობთ მოსახლეობას. დანადგარებიც სრული დატვირთვით მუშაობს. აქვე აღვნიშნავ, რომ დანადგარები საზღვარგარეთიდან შემოვიტანეთ. დაახლოებით 40 ათასი დოლარის ღირებულებისაა. დანადგარებს შეუძლიათ, ერთ საათში, 300 კილო გრანულირებული საკვები გამოუშვას, ხოლო არაგრანულირებული საკვების შემთხვევაში 1200 კილო – საათში.

- რამდენი სახის კომბინირებულ საკვებს ამზადებთ საწარმოში და ძირითადად რომელი ცხოველებისთვისაა გათვლილი?

- ამჟამად, ვამზადებთ მეწველი ფურის, დედა ღორის, ხოს და გოჭის კომბინირებულ საკვებს, შემდგომში კი ფრინველისა და თევზის კომბინირებულ საკვებსაც დავამზადებთ. მაგალითად, მეწველი ფურის შემთხვევაში, ვიყენებთ ქერს, ხორბალს, სიმინდს, მზესუმზირის და სოიოს შოტს,

კირქვას, მარილს და პრემიქსის კონცენტრატს მცირე რაოდენობით. ღორის შემთხვევაში კი, ყოველივე ამ ინგრედიენტთან ერთად, თევზის ფქვილსაც ვუმატებთ, რომელიც საკმაოდ ძვირი და ძნელად საშოვნელი პროდუქტია. ზოგადად, მოსახლეობა იშვიათად იყენებს კომბინირებულ საკვებს, სარგებლობენ უმეტესად ქერით და ქატოთი, რომელიც პურის ფქვილის ანაცერია და არ აქვს ის ენერგეტიკული ღირებულება. ჩვენი კომბინირებული საკვების უპირატესობა კი ის გახლავთ, რომ ერთ საკვებში მოთავსებულია ვიტამინებისა და სასარგებლო ნივთიერების დიდი რაოდენობა, რომელიც ზრდის წველადობას და პირუტყვი მაღევე იმატებს წონაშიც. ამ საქმის წამოწყებასთან ერთად, კარგად გავერკვიეთ მცირე დეტალებშიც და გავრკვიეთ, რომ ცალკეული, მარცვლეული საკვები არასოდეს შეიცავს ცხოველის საზრდოობისათვის აუცილებელ ყველა ელემენტს, ამიტომ ცალ-ცალკე, თითოეული მათგანი, შეიძლება ითქვას არასრულფასოვანია. ამ საკვებთან სხვადასხვა კომბინაციათა შეფარდება კი სრულფასოვან კომბინირებულ საკვებს მოგვცემს. სხვათაშორის, ერთ-ერთ ოჯახში, ჩვენი საკვების გამოცდის შემდეგ, მეწველმა ფურმა 5 ლიტრით მოიმატა რძის მოცემა.

- მოსახლეობისათვის

რამდენად შეღავათიან ფასში გაყიდით კომბინირებულ საკვებს?

- ჩვენი გამოთვლებით, საკვების ღირებულება 1 ლარი და ათი თეთრიდან, ლარნახევრამდე მერყეობს. თევზის საკვების შემთხვევაში კი ფასი 2 ლარამდე გაიზრდება. ფასები დამოკიდებული იქნება ნედლეულის შესასყიდ ფასზე. მას დაემატება ბიოლოგიური ნივთიერებები და მარილი, რომელიც მნიშვნელოვანია ცხოველისათვის. კომბინირებული საკვებისათვის საჭირო ნედლეულს კი ისევე მოსახლეობისაგან შევიწყობდით. მაგალითად ფერმერს შეუძლია მოგვიტანოს საწარმოში სასურველი მარცვლეული და ჩვენ დავუშვადებთ მას სასურველ საკვებს. ამგვარი პრინციპი კი, ვფიქრობთ, ორმაგი სარგებლიანობაა.

- რამდენი ადამიანის დასაქმებას გეგმავთ საწარმოში?

- ცხადია, დასაქმება ჩვენთვის პრიორიტეტულია, თუმცა მაღალი სტანდარტების მანქანა-დანადგარებით აღჭურვილი საწარმო მაქსიმალურად გამორიცხავს ხელით შრომას, ასე რომ, ამჟამად საწარმოში 6 ადამიანია დასაქმებული. ვიმედოვნებთ, რიცხვი, აუცილებლად, გაიზრდება.

- ბატონო ლექსო, ცხადია, საწარმოში ყველა სტანდარტი დაცული იქნება...

- ცხადია, ჩვენი საწარმო აუცილებლად უზრუნველყოფს უმაღლეს სტანდარტებს და მომხმარებლისათვის უმაღლესი ხარისხის პროდუქციის მიწოდებას. ჩვენი უმთავრესი დანიშნულება საშუალო და მცირე ზომის ფერმერებისათვის ცხოველთა და ფრინველთა უმაღლესი ხარისხის კომბინირებული საკვებით და საკვები დანამატებით უზრუნველყოფა იქნება. მომხმარებლისათვის ხარისხიანი პროდუქციის შეთავაზება ჩვენი უპირველესი ამოცანა გახდება. ჩვენი პროდუქტი უსათუაოდ გაივლის ხარისხის მკაცრ კონტროლს, რითაც, შევეცდებით, სრულიად დავაკმაყოფილოთ ჩვენი მუნიციპალიტეტის ფერმერების მოთხოვნები ცხოველთა და ფრინველთა კვების სფეროში.

„ხაშურის მოამბე“ კვლავც მიადევნებს თვალს საწარმოს მუშაობას და ეცდება ამ და სხვა მცირე



თუ საშუალო სიმძლავრის საწარმოებს პოპულარიზაცია გაუკეთოს, რადგან მუნიციპალიტეტის ეკონომიკის აღმავლობა და უმუშევრობის შემცირების პროცესი სწორედ მსგავსი ბიზნესის საშუალებით უნდა მოხდეს.

თ. ახალკაცი



- ძიუღო -

ხაშურის კლუბი „სამურაი“ ოქროს ლიგაში იასპარეზებს

ძიუღოში, საკლუბო ჩემპიონატები ძალზე პოპულარულია მთელს მსოფლიოში და არაფერია გასაკვირი, რომ საქართველოშიც მრავალი კლუბი იბრძვის უმაღლესი ტიტულების მოსაპოვებლად. ამ დღეებში, კადეტებს შორის, საქართველოს პირველობა გაიმართა კლუბებს შორის. ხაშურის სასპორტო სკოლას კლუბი „სამურაი“ წარმოადგენდა. პირველობისათვის ბრძოლაში კი 47 გუნდი მონაწილეობდა. ჩვენმა ახალგაზრდებმა შესანიშნავად წარმოადგინეს თავი და იმ 8 გუნდს შორის მოხვდნენ, რომლებიც ე.წ. „ოქროს ლიგას“ შექმნიან და ივნისის თვის დასაწყისში ჩემპიონობისათვის იბრძობდნენ. ოქროს ლიგაში მოსახვედრად კი ჩვენმა ძიუღლისტებმა ყვარელის(5:0), ახმეტის (4:1), მარნეულის (4:1) და ბათუმის (4:1) კლუბები ჩამოცილეს გზიდან. მწვრთნელების ბუსუტი ბუსერიკიძის, ბეგლარ ხარშილაძის და ომარ ლომიძის დამოძღვრული კადეტები, რა თქმა უნდა, ამაზე არ აპირებენ გაჩერებას და მათგან უმაღლესი სინჯის მედლებსაც ველოთ. „სამურაი“ კი ამ ჩემპიონატში ასეთი შემადგენლობით ასპარეზობდა: ნიკა ბლიაძე (55კგ), გიორგი ნასყიდაშვილი (60კგ), ლუკა ნოძაზე(66კგ.) ნოდარ ბუსერიკიძე(66კგ.), ზაურ დვალიშვილი (73კგ.) და პაატა ტაბატაძე (+73კგ.).

დავასუფთაოთ ჩვენი გარემო



პროექტ „დავასუფთაოთ საქართველოს“ ფარგლებში, 22 მარტს, ხაშურის მუნიციპალიტეტის გამგეობის და საკრებულოს თანამშრომლებმა, სოფელ ოსიაურში, ე.წ. „ბატონის ბაღის“ მიმდებარე ტერიტორია დაასუფთავეს. აქციაში ჩართული იყო ა(ა)იპ „ხაშურსერვისი“ და ადგილობრივი მოსახლეობა.

კლასიკური მუსიკის სადამომ წარმატებით ჩაიარა

22 მარტს, ხაშურის სამუსიკო სკოლის დარბაზში, კლასიკური მუსიკის სადამომ გაიმართა. კონცერტში, „სიმებიან კვარტეტთან“ ერთად, პედაგოგ ფატი სადალაშვილის მოსწავლეები: ლიკა კალმახელიძე, სოფიო ნოზაძე და ანი



ქურდაძე მონაწილეობდნენ. პატარებმა, რომელთაც როიალთან აკომპანიმენტს უწევდა კონცერტმეისტერი თამაზ აბრამიძე, ნაწარმოებები ვიოლინოზე შეასრულეს.

კლასიკური მუსიკის სადამომზე პიაცოლას, ვივალდის, გლუკის, რუბინშტეინის, ბომის, ხაჩატურიანის, ჩაიკოვსკის, კრეისლერის და ბეთჰოვენის ნაწარმოებები შესრულდა.

სადამოს უძღვებოდა ხელოვნებათმცოდნე ინგა ხრიკაძე. მუსიკოს-შემსრულებელთა შემოქმედებამ, მაყურებლის დიდი მოწონება დაიმსახურა.

დასასრულს, ორგანიზატორებმა მადლობა გადაუხადეს ხაშურის მუნიციპალიტეტის გამგებელს გიორგი გურასპაშვილს, კულტურის სამსახურის უფროსს კოტე ფრუიძეს და ყველა იმ ადამიანს, ვინც ხელი შეუწყო მუნიციპალიტეტში პროფესიული მუსიკის განვითარებას.

აღსანიშნავია, რომ 24 მარტს დაიწყო და 2 აპრილამდე გაიმართება კლასიკური მუსიკის მე-10 საიუბილეო რესპუბლიკური და საერთაშორისო კონკურს-ფესტივალი „მომავლის ვარსკვლავები 2017“, სადაც მონაწილეობას მიიღებენ ხაშურის სამუსიკო სკოლის მოსწავლეები; სოფიო ნოზაძე, ლიკა კალმახელიძე და ბარბარე ნოზაძე.

მადლობა თანადგომისთვის

სოფელ ცოცხნარის ე.წ. ლაშხვის უბნის მაცხოვრებლები მადლობას ვუხდით ხაშურის მუნიციპალიტეტის გამგებელს ბატონ გიორგი გურასპაშვილს და ცოცხნარის ადმინისტრაციულ ერთეულში გამგებლის წარმომადგენელს ბატონ დავით გოგალაძეს დიდთოვლობის პერიოდში გამოჩენილი ყურადღებებისა და თანადგომისთვის.

უბნის მოსახლეობის სახელით რევაზ გრიგალაშვილი

შუშის ქარხნის დასახლებაში საბავშვო ბაღი ნოემბრისათვის ექსპლუატაციაში შევა

580 ათასი ლარი - ეს თანხა უნდა მოხმარდეს შუშის ქარხნის დასახლებაში საბავშვო ბაღის მშენებლობას. ბავშვთა სამი ჯგუფისთვის იქნება განკუთვნილი და 100-120 ბავშვს მოემსახურება. პროექტი (სურათზე) უკვე მზადაა. უახლოეს დღეებში კი ტენდერი მშენებლობაზე გამოცხადდება, სადაც ყველა ტექნოლოგია და მოთხოვნა იქნება გათვალისწინებული.

საბავშვო ბაღის მშენებლობა რეგიონული განვითარების ფონდის და ადგილობრივი ბიუჯეტის თანადაფინანსებით განხორციელდება.



ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27.

E-mail Khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499.

♣-ით მონიშნული სტატია იბეჭდება დაკვეთით გაზეთი იბეჭდება თბილისში. რედაქტორი რობერტ სუხიაშვილი.